

**Piniagassanit isumalluutit siunissami nunap immikkoortuini sumiiffinnilu ataasiakkaani periarfissaasut naapertorlugit malittarisassatigut aqunneqalernissaat siunertaralugu, piniarneq aallaaniarnerlu pillugu Inatsisartut inatsisaata kiisalu nalunaarutit attuumassutilit allangortinneqarnissaat sulissutigeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut**

### **pillugu**

**Aalisarnermut, Piniarnermut Nunalerinermullu ataatsimiititaliap**

### **ISUMALIUTISSISSIONAA**

### **Siunnersuutip aappassaaneerneqarneranut saqqummiunneqartoq**

Aalisarnermut, Piniarnermut Nunalerinermullu ataatsimiititaliaq suliarinninnermi ukuninnga inuttaqarpooq:

Inatsisartunut ilaasortaq Hans Aronen, Siulittaasoq, Inuit Ataqatigiit  
 Inatsisartunut ilaasortaq Andreas Uldum, Siulittaasup tullia, Demokraterne  
 Inatsisartunut ilaasortaq Harald Bianco, Inuit Ataqatigit  
 Inatsisartunut ilaasortaq Hans Enoksen, Siumut  
 Inatsisartunut ilaasortaq Siverth K. Heilmann, Atassut

### **Siunnersuutip siullermeerneqarnera**

Siullermeereernerata kingorna aalajangiiffigisassatut siunnersuut Aalisarnermut ataatsimiititaliamit suliarineqarpoq, Inatsisartullu aalajangiinissamut tunngavissaattut tulliuttut Ataatsimiititaliap ilanngussarai. Siunnersuutip siullermeerneqarnerani siunnersummi siunertat piviusungortinneqarnissaannut Inatsisartuni nalinginnaasumik tapersersuisoqartoq Ataatsimiititaliamit maluginiarneqarpoq. Tamanna pissaaq Naalakkersuisuisut akissuteqaataanni pineqartutut piniarneq aallaaniarnerlu pillugit inatsisimmik atuuttumik nr. 12-mik, 29. oktober 1999-imeersumik kingornalu allannguutigisimasai pillugit ilimasaarutigineqartutut nutarterinikkut, inatsimmillu nutarterinermi aalajangersimasumik ilanngussinikkut. Taamatuttaaq siunnersuut akuerisassatut Naalakkersuisunit inassutaasoq Ataatsimiititaliap maluginiarpa.

### **Siunnersuutip imarisaa**

Inatsisartut piniarneq aallaaniarnerlu pillugit inatsimmi siunissami isumalluutinik uumassusilinnik aqtsinermi nunap immikkoortuini sumiiffinnilu ataasiakkaani naammaginartumik mianerinnittooqarsinnaaneranik periarfissaqartoqarnissaanut inatsisitigut

tunngavissiisoqarnissaat siunnersuuteqartut aalajangiiffigisassatut taamatut siunnersuuteqarnermikkut kissaatigaat. Siunnersuuteqartut isumaqarput isumalluutit uumassusillit piniarnermi aallaaniarnermilu ullumikkornit annertunerusumik naleqqussarneqarnissaannut kommunit aaqqissuuteqqinneranni naalakkersuinikkut siunertaasut aamma tamatuma kingorna nunap immikkoortuinik pilersaarusrusiornermut Naalakkersuisut pingaartitsinerat tunngavissiisut, taamaalilluni uumasut nuuttarnerisa sumiiffinnilu aalajangersimasuni piniarnikkut eqqissisimatitsinikkullu malittarisassat annertunerusumik ataqtigilernissaat pilissalluni.

Maanna malittarisassaasut sakkortuallaartutut isumaqarnartut siunnersuuteqartut oqariartuutiminni tunngavilersuipput, tamatumalu kingunerisaanik siunnersuuteqartut isumaat malillugit piniartut aningaasarsiornerminni annaasaqartarput, siunnersuuteqartummi naliliinerat malillugu malittarisassat maanna taamatut ilusiligaaneranni najukkami piniarnikkut periarfissatsialaat atorneqarsinnaasut piniartunit atorluarnissaat pinngitsoortinnejartarmat.

### **Siunnersutip ataatsimiitaliamit suliarineqarnera**

Aallaqqaasiullugu aalajangiiffigisassatut siunnersuummi naalakkersuinikkut siunertap siamasippallaartutut ataatsimiitaliamit isumaqarfingineqarpoq, tamanna aalajangiiffigisassatut siunnersutip aalajangersimasumik inuiaqatigiinnut sunniutissaasa timitalernissaannut ilaatigut nalorninartoqarsinnaammatt. Ataatsimiitaliap maluginiarpa siunissami piniarneq aallaaniarnerlu pillugu inatsisip nutarterneqarnerata piujuartitsinissamut tunngaviusumut akerliunnginnissaa Naalakkersuisut pingaartikkaat, tamatumani timmissanik piniakkanillu piaqqiornerup nalaani piniarneq akuerineqarsinnaanngimmat. Siunertaq taanna tunngaviatigut ataatsimiitaliamit isumaqatigineqarsinnaavoq, timmissat piniakkallu piaqqiornerisa nalaanni pisariaqartumik eqqissisimatinneqartariaqarmata, taamaalillutik uumasoqatigiit kinguaassiorsinnaassammata. Ataatsimiitaliap maluginiarpaattaaq piujuartitsinermik tunngaviusumut paasinneriaaseq Naalakkersuisunit annertusissallugu imatut isumaqarfingineqartoq:

*"Naalakkersuisut isumaqarput piniarneq aalisarnerlu ikiliartortitsinnginnissaq tunaartalarugu ineriartortinnejartariaqartut, piniartut aalisartullu Kalaallit Nunaata imminut pilersortunngortikkiartorneqarnerani, inuussutissanut tunngatillugu, pingaarutilimmik isumalluutaallutik peqataanissaat. Inatsisit nutarterneqarnerata tamanna anguniarlugu sulissutigeqqinnejartariaqartut, ilaatigut ikiliartortitsinnginnissamik siunertaqarneq, aammu atugarissaarnissamut akileraartarnermullu ataatsimiitaliap inassuteqaataanni uumasunik nunap isumalluutaanik pitsaanerpaamik – taakkununnga ilaallutik piniagassat – sapinngisamik pitsaanerpaamik iluaqtigineqarnissaat." (Issuaaneq naavoq)*

Ataatsimiitaliaq isumaqarpoq aalajangiiffisassatut siunnersuutip matuma siunertaasa piviusunngortinniarnerannut atatillugu piujuartitsineq pillugu siamasinnerusumik nassuaateqarnissaq pingaaruteqartoq, taamaalilluni inatsisisamik suliniuteqarnermi pisussami piniarnermik inuussutissarsiummik siunissamut isiginnittumik inuussutissarsiornermut iliuuseqartoqarnissa ilangunneqarlunilu pilersinnaammatt. Nalunaarusiami 2005-imeersumi *Piniarneq pillugu Inuussutissarsiuteqarnermik misissueqqissaarneq* -up eqikkarneqarnerani ilaatigut ima allassimasoqarpoq:

*”34. Piujuartitsineq tunngavigalugu ingerlatsinermi pingaaruteqarluinnartut ilagaat innuttaasut inuuniarnikkut aningaasaqarnikkullu piumasaasa qulakkeerneqarnerat. Tassunga atatillugu inuussutissarsiutigalugu piniarnerup iluani inoqarpoq inuuniarnissamut periarfissaqartunik nunat tamalaat naliliineranni piitsuussutsip killingani inissisimasunik. Taamaaqataanik piniartoqarpoq pisortat inuussutissarsiummut tapiissuteqartarnerannik pinngitsuungaqarsinnaanngitsunik....” (Issuaaneq naavoq)*

Piniarnermik inuussutissarsiuteqarnermi siunissami periarfissat ataavartumik ujartorneqarnissaasa pingaaruteqarnera siuliani issuakkap naqissuserpaa. Tamanna pissaaq aningaasarsiornikkut uumassuseqarnikkullu piujuartitsisinnaaneq tunngavigalugu annertunerusumik inuussutissanik imminut pilersorsinnaanermik anguniagaqarnermut atatillugu, taamaalilluni inuussutissarsiummi isertittakkat ataatsimut isigalugu annertusineqarsinnaammata. Tamatumunnga atatillugu Akileraartarneq Atugarissaarnerlu pillugit Isumalioqatigiisitap sulinermini nalilersuinerminilu ullumikkut piniarnermik inuussutissarsiuteqarnermi unammilligassat aamma ilangussuunneqarnissaat Naalakkersuisunit ersersinneqarmat Ataatsimiitaliamit tamanna ajunngitsutut isumaqarfingineqarpoq. Tamatumunnga atatillugu Naalakkersuisut Ataatsimiitaliamit kaammattorneqassapput Akileraartarneq Atugarissaarnerlu pillugit Isumalioqatigiisitap sulinermini nalunaarusiami *Piniarneq pillugu Inuussutissarsiuteqarnermik misissueqqissaarneq*-mit misissueqqissaarnerit saqqummiunneqarsimasut aamma ilanngutissagai. Siuliani allassimasunut atatillugu ataatsimiitaliap nalilerpaa kalaaliminernik peqqinnartunik mamartunillu imminut pilersornerup siuarsarneqarnissaanut Naalakkersuisut anguniagaqarnerminni aamma Inuussutissat pillugit naalakkersuinikkut nassuaammi 2004-meersumi misissueqqissaarnerit kaammattuutilu allassimasut iluaqutaasussamik isumassarsiorfigisinnaassagaat. Nassuaammut siuleqummi ilaatigut ima allassimasoqarpoq:

*”Nunap pisuussutaanik pitsaanerusumik pimoorussaanerusumillu iluaquteqarnissaq inuussutissanillu annertunerusumik imminut pilersorsinnaanissaq Naalakkersuisut kissaatigaat. Tamaku imminnut attassinnaasumik aningaasaqalernissap tungaanut sulinermi alloriarnerupput pingaaruteqartut, kisianni nassuaammi saqqummiunneqartumi takuneqarsinnaasutut tamanna innuttaasut peqqissusiannut malunnaateqarluartumik iluaqutaassasoq, tassami kalaallit tunisassiaat amerlasuut inuussutissartaqarluarmata nunat killiit nerisassaataanni amigaatigineqartunik.” (Issuaaneq naavoq).*

Inuussutissanik imminut pilersorsinnaanermut annertunerusumik isiginninniarnermut Naalakkersuisut oqaatigisaattut taamanikkut nalunaarusiami taamatut allassimasutut siunertaqarneq angusaqarluarusussusermut naapertuulluarpoq. Aalajangiiffisassatut siunnersuutip matuma suliareqqinnerani ataatsimut isigalugu eqqarsartoqarnissaa Ataatsimiititaliamit kaammattutigineqassaaq, taamaalluni piniarnermi inuussutissarsiuteqarnermi inuuniarnermi aningaasarsiornikkut nunallu sortaani inissisimaneq aallaavigalugu unammilligassat tunngaviusut isiginiarneqassammata kiisalu siamasinnerpaamik ilisimasanik periarfissaqarneq tunngavigalugu misissorneqassallutik. Naggataagut Ataatsimiititaliaq isumaqarpoq siunissami inatsimmik suliaqarnissami soqutigisallit sussaqartut tamaasa Naalakkersuisut ilaatisagai, tassunga ilanngullugit KNAPK, kommunit, najukkami piniartut peqatigiiffi, Pinngortitaleriffik il.il. Ataatsimiititaliaq isumaqarpoq piumasarisat suussusersineqarnissaannut nassuiarnissaannullu piniarnerup aallaaniarnerullu annertussusaasa najukkami nunallu immikkoortuani piumasarisanut pissutsinullu naleqqussarneqarnissaannut najukkami piniartut ilisimasaat pingaarutilittut pinngitsoorani ilaasariaqartut.

### **Demokraatinit immikkut oqaaseqaatit**

Siunnersuummi siunertat siunniussallu Demokraatini sinniisuutitamit tapersorsorneqarput, kisiannili tulliuttunik oqaaseqaateqassalluni pissutaqarluni. Isumaqarpugut Kalaallit Nunaat aallaaniarfinnut immikkoortiterriaqartoq, nunap immikkoortortaani tamani assigiinnik peqqussusiornissaq ajornannginnerulersinniarlugu peqataanillu nunap immikkoortuini assigiinngissutsit ataqqiniarlugit. Pisariaqarluinnarporli nunami namminermi nunarsuullu sinnerani piniagassat nunat immikkoortuisa arlallit akornanni nuttartartut ataqqineqarnissaat. Matumani aamma eqqaarusupparput aallaaniarnermut isumasioqatigiinnik pilersitsinissaq. Isumaqarpugut susassaqartut tamarmik sinniisuuffigisaannik aallaaniarnermut isumasioqatigiinnik pilersitsisoqartariaqartoq. Piniartut, qimatulisartut, tammaviuttussarsiniarlutik aallaaniartartut, pinngortitamik illersuiniaqatigiit soorlu Avataq aamma Timmiaq, takornarialerisut aamma ilisimatuut. Aallaaniarneq pillugu isumasioqatigiit Naalakkersuisunut aallaaniarnerup aqunnissaa pillugu inassuteqartassaaq. Mannali periarfissaq iluatsillugu erseqqissarusupparput aallaaniarneq pillugu isumasioqatigiit politikerit iliuuseqarumanngitsut utoqqatsissutissaattut pilersikkusunnginnatsigu. Politikerit piniarnerup annertussusissaa piniagassanillu agguaaneq akisussaaffigisussaavaat. Demokraatinit sinniisuutitap Naalakkersuisut kaammattorpai inatsimmik nutarterinermi aallaaniarnermut isumarioqatigiissitanik pilersitsinissamut isumap ilanngunnissaa isumaliutigeqqullugu.

## Ataatsimiititaliap inassutaa

**Ataatsimiititaliami amerlanerussuteqarlutik** Inuit Ataqatigiinnit Demokratinillu sinniisuutitat siunnersuut **akuuerineqassasoq** inassutigaat.

Ataatsimiititaliami **ikinnerussuteqarlutik** Siumumit Atassutikkunnillu sinniisuutitat siunnersuut immikkut ataani allaqqasunik oqaaseqaateqarlutik **akuersaarneqassanngitsoq** inassutigaat.

Matumuuna Siumut Atassullu ataatsimoortumik ikinnerussuteqarluta imaattumik oqaaseqaateqarniarpugut. Ataatsimiititaliap suliarinninera assut ilungersunartumik isigaarput makku pissutigalugit. Siullermik siunnersuuteqartut tunngavilersuumik saqqummiussaqanngillat suut aaqqittariaqarnersut tikuassallugit, aammalu suut massakkut inatsimmi aaqqittariaqarnersut.

Siumumi Atassummilu isumaqarpugut ataatsimiititaliami sulineq amigarluinnartumik ingerlanneqartoq siunnersuutip suliarineqarnera eqqarsaatigalugu, tassami tusarniaanissamulluunniit periarfissaqartinneqannginnatta soorlu KNAPK-mut KANUKOKA-mut Piniarneq pillugu siunnersuisooqatiginnullu, tassami taakku aamma qularnanngivimmat aaqqissutaasinnaasunik siunnersuuteqarnissamut oqaaseqaateqarnissaat.

Timmissat pillugit nalunaarut, Nannunniartarnermut aaffanniartarnermut qilalugarniartarnermut, aammalu qaleralinnut qassusersortarnermut tunngasut. Sinerissami piniartunut sunngiffimmilu piniartartunut assut akimmisaarutaasartoq iluarsiiufigineqassasoq Atassutip Siumullu kissatigaat. Aammalu Atassutip Siumullu isumaqatigisinnaanngilaat Piniartunut Aalisartunullu tunngasut, aammalu piniakkanut sumiiffinni ataasiakkaanut periarfissat pillugit nalilersuinissat Akileraartarneq Atugarissaarnerlu pillugit isumalioqatigiissitap sulinerminut ilanngutissagaai. Tassami ullumikkut naleqqussagassat akileraartarnermi isumalioqatigiissitamut kaaminneqarsinnaanngimmata piaartumimmi suliarineqarnissaat innuttaasut pisariaqartimmassuk. Aammalu Katuffiit sussassaqartut, minnerunngitsumillu aalisartut piniartullu maani nunatsinni innuttaaqataasut pinngortitaq uumasullu ilisimalluarmatigit pissusissamisuunngilluinnarpoq Akileraartarneq pillugu isumalioqatigiissitamut suliassangortinnejarnissaat Atassutip Siumullu akuersaanngilluinnarpaat.

Taamatut oqaaseqarluni siulianilu allassimasutut paasinnilluni Ataatsimiititaliap siunnersuut aappassaaniigassanngortippaa.

Hans Aronsen

Siulittaasoq

Andreas Uldum

Siulittaasup tullia

Hans Enoksen

Siverth K. Heilmann

Harald Bianco